

accusatore eget, non testes requirit. Omnia enim nuda
atque detecta sunt oculis iudicantis. Nec factorum tan-
50 tummodo, verum etiam cogitationum nostrarum defen-
sioni necessario subiacemus. Serutator enim atque dis-
cretor est cogitationis et cordis ille qui iudicat. Sed forsi-
tan naturali infirmitate temptabimus crimen obtegere,
nec potuisse nos iugum susceptum ferre dicemus. Et qua-
55 lis haec excusatio erit, iugum nos placidum non valuisse
sufferre, onus nos non potuisse portare, quod ipse voca-
verit leve ? Immo grave et onerosum pondus putare
quietem laborum, ad quam nos Christus invitat dicens :
« Venite ad me omnes qui laboratis et onerati estis. Et
60 ego vos requiescere faciam. » Et rursus : « Iugum meum
suave est et onus meum leve. » Quid enim levius esse
dices ac melius, quam sollicitudine saecularium et labo-
ribus et metu exui ? Quam ab eius mundi fluctibus segre-
gari et possidere placidi tranquillique portus securitatem ?

3. Age, prospiciamus quid in hoc saeculo nobis laetum,
quid optabile esse videatur ? Sane, dignitatem et opes
dices et ambitiones humanae felicitatis [dicis] esse glo-
riam. Sed quid his miserabilius erit, si ea libertati Chris-
5 tianorum volueris comparare. Ille primum quem beatum
aestimas iudex populi iracundiae subiacet multitudinisque
vulgaris irrationalis impetum tremit, maiorum autem
potestatum auctoritatem veretur et perpetua pro his
quos regit sollicitudine fatigatur, et qui paulo ante iudex
10 erat, fit repente privatus. Non est profecto theatralibus